

















Declaration

D V ROY D E N A-
uarre contre les calomnies
publiees contre luy , & pro-
testations de ceux de la Li-
gue, qui se sont esleuez en ce
Royaume.



Imprimé nouuellement.

M. D. LXXXV.

DECLARATION
Case
F
39
326
15854

THE NEWBERRY
LIBRARY

UNIVERSITY OF CHICAGO
LIBRARY



D E C L A R A T I O N D U R O Y
*de Navarre contre les calomnies publiees
 contre luy, & protestations de ceux de la
 Ligue, qui se sont esleuez en ce Royaume.*

I.



E Roy de Navarre ayant vëu
 les protestations & declara-
 tions, de ceux qui troublent
 aujourd'huy l'Estat de ce
 Royaume, soubz le nom de
 Ligue sainte, desquelles ils

veulent couvrir leur mauuaiseintention, par-
 tie d'un zele de Religion, & partie d'une affe-
 ction du bien public, mais particulièrement
 le prennent directement à partie, comme He-
 retique, relaps, persecuteur de l'Eglise, pertur-
 bateur de l'Estat, ennemy juré de tous les Ca-
 tholiques, à estimé estre de son deuoir d'es-
 claircir tous Rois, Princes, Estats, & nations
 de la Chrestienté, contre ces calomnies, mais
 specialement le Roy son souuerain Seigneur,
 & le peuple de ce Royaume, de tous Estats

& qualitez, puisque ainsi est que à l'ombre de luy ils ne font point de conscience d'attenter à la Couronne de son Prince, & confondre miserablement tout son Estat.

II.

D E C L A R E donc premierement en ce qui concerne sa Religion ledit Seigneur Roy de Nauarre deuant **D I E U** qui void le fons de son cœur, deuant le Roy son souuerain Seigneur, auquel il desire principalement approuuer ses actions, deuant tous les susdits Princes & nations qu'il en fera volontiers tesmoins & juges, qu'il n'espere son salut qu'en la Foy & Religion Chrestienne, qu'il embrasse de toute son affection, & pour regle infallible de laquelle il reçoit la parolle contenuë au vieil & nouveau Testament, qu'il à pleu à **D I E U** laisser en ces tenebres pour lumiere & direction de son Eglise: Qu'il croit vne Eglise Catholique Apostolique: pour la conseruation & augmentation de laquelle en toutes sortes de graces, il prie **D I E U** journellement & s'estimerait heureux d'espandre son sang en la defendant contre les infideles: Qu'il croit & reçoit les Symboles ou Abregez de la Foy Chrestienne qui ont esté dressez par icelle Eglise Catholique Apostolique

pour seruir de marques par lesquelles les Chrestiens Orthodoxes fussent discernés de tous mal-sentans de la Foy & Heretiques: Comme aussi il embrasse les plus anciens, celebres, & legitimes Conciles qui ont esté tenus contr'eux, Anathematize de bon cœur toutes les doctrines par eux condamnées, & est prest & sera tousjours pour la reuerence qu'il rend à l'Eglise de subir son jugement & acquiescer à son arrest quand elle sera bien assemblee en vn legitime & saint Concile.

III.

Q V A N T aux differents dont est aujourd'huy question en l'Eglise, desire ledit Seigneur Roy de Nauarre, qu'il soit considéré qu'il n'est, ny le seul, ny le premier qui se soit plaint des abuz introduicts en icelle, & qui en à requis la reformation : & pourtant qu'il feroit trop dur que ce desir vrayement Chrestien de veoir l'Eglise repurée luy fust imputé à heresie, ou à inimitié contre l'Eglise: Que c'est vne plainte commune depuis cinq cens ans & plus de tous les Princes, de tous les doctes, de tous les saints personages: Que l'Eglise par ce long espace de temps auoit beaucoup perdu de ceste premiere pureté & sincerité, étant icelle composée d'hommes

qui sans doute y apportoyent tousjours de
l'homme quant & eux , Que c'est la voix de
tous les Conciles sans nuls excepter , qui ont
esté tenuz depuis le susdit temps, que l'Eglise
auoit besoin de reformation depuis la teste
jusques aux piedz , tant aux chefs que aux
mēbres, Qu'apres ceste reformation auoyent
aspiré & soupiré les plus gens de bien en
chasque siecle, de la bouche desquels ne seroit
jamais sortie ceste sentence, que , qui dit que
l'Eglise à besoin de repurgation d'eust estre
tenu pour heretique ou ennemyd'icelle, Que
les Rois tres-Chrestiens recognoissans tres-
bien cela, auroyent souuent pour c'est effect
estimé estre de leur charge, & de l'acquit de
leurs consciences , d'exhorter le Pape & les
Princes Chrestiens à vn Concile general,
lequel au defaut & en cas de conuience d'i-
celuy , ilz auroient bien sceu conuoquer de
leur autorité , dōt seroient sorties soubz leur
nom mesmes , plusieurs treflouables , ordo-
nances pour la reformation de l'Eglise Galli-
cane , Qu'en fin apres vne lōgue querimonie
de plusieurs siecles , n'y mettant la main ceux
ausquelz ilz sembloit appartenir , ains s'occu-
pans plustost, comme chacun scait, aux nego-
tiations du mode seroit aduenue que plusieurs

Princes, peuples, & estatz, poisons avec vn grand soing les raisons qui leur estoient allegues, & les voiant soustenues par la cōstance d'infinies persōnes de toutes qualitez, es plus grans tourmens iusques a la mort, auroient requis la susdite Reformation en vn Concile legitime, & au refus d'icelle auroient protesté des abus qu'ilz pretendoient en l'Eglise, & y auroient eux-mesmes mis la main, dont seroit sorti le Schisme que ledict Seigneur Roy de Nauarre deplore auourd'huy en l'Eglise Chrestienne, & auquel certes depuis tant de temps il n'estoit impossible de trouuer remede, si l'honneur de Dieu, & le salut des hommes, nous eust touché d'aussi pres, que nostre gloire ou nostre interest particulier.

III.

DIT pour son regard ledit Seigneur Roy de Nauarre, qu'il seroit non seulement né pendant ce Schisme adueni en l'Eglise Chrestienne, duquel il estime la continuation deuoit estre imputée a ceux qui n'ont point cherché les moiens de reunir l'Eglise comme ilz deuoient, mais mesmes auroit esté eleué en France pendant l'exercice des deux Religions permis par le Roy es Estatz generaux de son Royaume, & depuis confirmé par plu-

sieurs Editz de sa Majesté : Qu'il auroit esté
 nourry, & instruiet des ses premiers ans en ce-
 ste creance qu'il y auoit des abus en la doctri-
 ne de l'Eglise Romaine, qui auoient besoin
 de reformation : Et s'est depuis en icelle for-
 tifié tant par la conuersation de plusieurs per-
 sonnes doctes, que par la lecture des Sainctes
 Escritures. Qu'il croit en son cœur & cōfesse
 franchement de bouche qu'il est trespersuadé
 que la verité est de sa part, qui auroit esté cau-
 se qu'il auroit encouru beaucoup de perilz, &
 de ruïnes, plustost que s'en departir : mesmes
 a ceste occasion, & a son grand regret n'au-
 roit eu moien de faire rāt de seruice ny auoir
 tant participé a la bonne grace de son Prince
 souuerain, que sans doute il eust peu faire, si en
 saine conscience, il eust peu s'accommoder
 a mesme profession que luy. Ce nonobstant
 pour faire cognoistre a tous que ce qu'il en a
 faict, n'a esté par obstinatio, ains par constan-
 ce & non par ambition, mais par le seul desir
 de son Salut, Il supplie tres-humblement sa
 Majesté de faire tenir vn Concile libre & legi-
 time selon qu'il auroit tousiours esté promis
 par ses Edictz : Estant ledit Seigneur Roy de
 Nauarre tout prest & resolu de receuoir in-
 struction par iceluy, & reigler sa creance par

ce qui en sera decidé sur les differents de la Religion.

V.

Q V E si on dit que le Concile de Trente a ja ordonné desdicts differents sans que plus il soit besoin d'y reuenir, Appelle ledit Seigneur Roy de Nauarre, la cōscience mesme des plus zelez Catholiques a tesmoin, si ledit Concile a esté de libre accez, ou non, veult que les Ambassadeurs du Roy son souuerain Seigneur, qui y assistoiēt, en soient creus, les Prelatz mesmes qui s'y trouuerēt de l'Eglise Gallicane: ioint que la guerre Ciuile brusloit lors par tous les coings de la France, aians les predecesseurs de ceux qui troublent a present l'Estat, violemment rompu la paix publique & l'Ordonnance de sa Majesté es Estatz Generaux de son Royaume, sur l'exercice des deux Religions, sans attendre ny la decision, ny la conuocation du Cōcile: Mais qui plus est, adiouste ledit Seigneur Roy de Nauarre, qu'en cor que la continuation d'iceluy Concile eust esté longuement poursuiue par le feu Roy Charles, & en fin obtenue du Pape Paul 3. & apres la publication d'iceluy, enuoyez Ambassadeurs par sa Majesté a Trente, avec Instructions Chrestiennes, Catholiques, confor-

mes aux Saincts Decretz de l'Eglise Romaine, & approuuees par la Sorbone, & par les Docteurs d'icelle enuoiez aussi audit Concile, avec lesditz Ambassadeurs: Toutes-fois quelque diligence qu'ils peussent faire enuers les Cardinaux, Legats, Presidens, audit Concile l'espace de dixhuit mois & plus, ne fut possible de rien obtenir conforme ausdictes Instructions, pour la reformatiō de l'ordre Ecclesiastique suiuant icelles, dont aduertie sa Majesté, & cognoissant tres-bien le mal qui en pouuoit aduenir, commenda à sesdits Ambassadeurs de protester contre ledit Concile, & la protestatiō faicte, s'en reuenir: Ce qu'ils firent incontinent: & quelque poursuite & requisition qui leur fut depuis faicte par le Pape, & le feu Cardinal de Lorraine pour retourner audit Concile, & y demourer iusques a la fin d'iceluy, ils ne le voulurēt iamais faire, tellement que ledit Concile fut continué, fini, & conclud sans eux, & sans estre par eux signé, suiuant la coustume de tout temps obseruée: dōt est aussi adueni que quelque instance qui ait esté faicte pour receuoir & publier ledit Concile en la Cour de Parlement de Paris, ladite Cour, chābres assemblees, l'a tousiours empesché, mesmes l'an mil cinq cens soixante

douze apres la Sainct Berthelemy, lors que le temps sembloit grandement fauoriser ladicte poursuite.

VI.

NE pense donc ledit Seigneur Roy de Nauarre, qu'il puisse estre tenu de gens de iugement pour Heretique ou pertinax, puis que la matiere est indecise, qu'il s'en soubmet a vn Concile, Aussi peu que pour plaideur ou pour iniuste, celui qui attend l'Arrest d'un Parlement, quoy que puisse cauiller l'Aduocat d'une partie, ny pareillemēt pour Schismatique ou Contumax, puis qu'il rend ceste obeissance & reuerence à l'assemblee de l'Eglise, d'estre prest d'y comparoistre, d'y rendre raison, d'y apprendre, mesmes d'y changer en mieux, quand le mieux luy sera enseigné. Se plaint au cōtraire que iusques ici il à veu par longues années tous ces zelateurs, pour le destruire, mais nul pour l'instruire. Se plaint d'un proces commencé pour l'execution d'une remonstrance commenee par Anatheme, sans aucune des formalitez requises preallables. Protestant deuant tous Princes, & Estats, & sur tout deuant le Roy, son souuerain, auquel il s'adresse pour auoir Iustice, & deuant les Estats de ce Royaume, ausquels ils veut pre-

senter ses actions cōtre les auteurs, & fauteurs de ceste Ligue, de si manifeste violence, precipitation, & iniustice.

VII.

DIT ledit Seigneur Roy de Nauarre, que aussi peu & moins encor luy peut conuenir le nom & blasme de Relaps, en vertu duquel, ores mesmes, que par vn Cōcile il acquiescat a changer d'opinion, ils pretendent le priuer de la succession de la Couronne. A laquelle pleust à Dieu qu'ils pensassent aussi peu que luy. Et par la, il laisse a penser vn chacun, en qu'elle charité ils y procedent, & quel doit estre leur dessein de luy retrâcher, entant qu'ils peuvent, le desir de se faire instruire en vn Concile, sans entrer au fonds qui se pourroit renuerser, & par les Canons, & par les exemples.

VIII.

RELAPS nomment ils en leur langage, ceux qui aians esté Heretiques, se sont cōuertis de l'Heresie, & y sont recheuz apres. Ainsi donc n'ayant par les anciens Canons, comme cy dessus à esté veu, ledit Seigneur Roy de Nauarre esté Heretique, il se fait tout clair aussi qu'il ne peut estre Relaps: Dit plus que quand il auroit esté ou seroit Heretique, aussi

peu pourroit il estre Relaps, veu qu'il n'a iamaïs esté conuerti de la pretendue Heresie, veu mesmes que nul n'a iamaïs pense a prendre la peine ou chercher les moïens de le reunir ou conuertir. Ains ces zelateurs n'ont eu autre but par tous leurs effects, & leursefforts que de le rendre odieux, & le ruiner.

IX.

ALLEGVENT icy que ledict Seigneur Roy de Nauarre apres la Sainct Barthelemy enuoya deuers lePape, & se rengea a la messe. Laissant l'aage a part. Chacū sçait assez qu'elle espece de conuersion ce fut, & s'il auoit sujet de juste crainte, & plus longue refutation seroit friuole, Tant y à que si nos actions par toutes les Loix sont estimees nulles, quand elles ont procedé, ou de crainte, ou de force, il est tout certain que iamaïs action n'eust moins de volonté, iamaïs action n'eut plus de force, tant y à aussi qu'il n'eut pas si tost recouuré sa volonté qu'il fit apparoir qu'elle elle estoit par profession publique, mesmes au milieu des Catholiques qui l'acópagnoyēt & sembloient le posseder alors, sans dissimuler, sans tergiuerfer: de ce peut apparoir son cœur du tout esloigné d'hypocrisie.

SUPPLIE tres-humblement ledict Seigneur Roy de Nauarre le Roy son Seigneur, qu'il luy plaise trouuer bon qu'en toute modestie il responde aussi au blasme qu'on luy impose, d'estre persecuteur de l'Eglise Catholique: & sur ce poinct il somme les consciences de ses plus grands ennemis de respondre deuant Dieu, si ce tiltre luy pourroit en rien appartenir: chacun cōsidere icy que les guerres ciuiles sont tombees sur les plus tendres ans dudit Seigneur Roy de Nauarre, & s'il y a apparence aucune qu'il eust entrepris vne guerre de gayeté de cœur, pour persecuter les Catholiques, desquels chacun sçait, & le nombre, & l'autorité, & la force en ce Royaume, totalement hors de persecution, lesquels mesmes couuerts du seul nom du Roy, estoient à labry pour son regard, & de tout ce qui deppend de luy, de tous attentats, entreprises, & injures: Et de faict on à bien ouy parler en France des rigueurs & persecutions ésans passez, mais nul ne l'a jamais interpreté que passiuement, au regard de ceux de la Religion, & actiuement au regard des autres, & vser autrement du mot seroit si impropremēt parlé, qu'il ne seroit entendu d'aucun.

IL pleut au Roy Charles de le faire reuenir en Cour & l'honora du mariage de sa sœur; il y vint en la Religion en laquelle il estoit nay & nourry, & ce qui suyuit vaut mieux oublié que ramenteu. Comme il sort de là, il se retire en ses terres: la paix se faisant avec feu Monseigneur, il ne fit instance d'un seul mot pour soy, & il ne s'y lit point vn article qui le touche quoy qu'il eust plus d'occasion sans doute, que nul autre, ou d'estre ennuyé des traictemens passez, ou d'estre recompensé des pertes souffertes, ne voulant ledict Seigneur Roy de Nauarre retarder le repos de ce Royaume, & le soulagement du peuple d'un seul jour par son occasion, si sçait-on que s'il eust voulu il estoit en sa main de se seruir de l'armée des Reistres, qui s'esbranloyent à toute heure a faute d'estre payez du Roy selon les articles de la paix, pour tourner teste vers Paris.

XII.

Av contraire ce fut deslors que les chefs de ceste Ligue abusans de sa bonté tramerent leur Ligue pretendue Sainte cōtre ledit Seigneur Roy de Nauarre, fraichemēt publiee, par laquelle ils juroyent en termes expres,

l'exterminatiō totale de ceux de la Religion, sans exception ny acception de personnes, sans respect ny esgard d'alliance, affinité, proximité, consanguinité, & de fraternité, dont la plus grand part des Catholiques eurent horreur : & plusieurs qui y estoient entrez sans sçauoir le fond, s'en reslirent aussi tost qu'ils le cognurent, & pour son particulier furent alors descouverts les memoires qui s'effectuent aujourd'huy, concluans sa mort & de Monseigneur le Prince son cousin, & de tout leur sang, pour se faire voye plus aisement (comme il est porté expressement) a l'inuasion de ce Royaume. Iugeront donc icy tous hommes de sain jugement qui estoit alors l'agent ou le patient, le persecuteur ou le persecuté.

XIII.

DE la donc vint a renaistre la guerre civile de l'an mil cinq cens soixante dixsept, eux ayans induit l'assemblée de Blois a l'exécution de leur dessein, auquel eust esté contre nature si ledict Seigneur Roy de Nauarre ou ceux qui faisoient mesme profession n'eussent fait deuoir de resister, il y alloit de sa personne, & de sa vie. Il y alloit de la conscience, & de l'honneur, il y alloit comme l'on dit aujourd'huy

jourd'huy du Royaume, & de l'Estat, le mal que le Roy n'a recognu qu'en sa fleur, ne se le pouuant imaginer de la part de ceux qui tenoyent leur bien de luy, Le Roy de Nauarre l'ayant recognu mesmes en graine, c'eust esté trahir soy-mesme, estre deserteur de c'est Estat, de se rendre a leur desir, au lieu de s'y opposer.

XIIII.

C E P E N D A N T quoy que les cruelles clauses de la conjuration susdicte fussent assez suffisantes pour tourner ce coup en fureur, la patience en vengeance, la douleur en generosité qui est naturelle a ceux ds sa maison, quoy que mesmes on vint à luy courir sus de toutes parts, & que ceux de la Religion fussent poursuivis a la rigueur, & astraits au choix, ou de sortir du Royaume, ou de renoncer a leur religion. Si ne voulut toutes-fois, ledit Seigneur Roy de Nauarre, es villes ou il auoit de la puissance vser de mesme façõ, enuers les Catholiques, n'y mesmes enuers les moines, & le Clergé, qui pouuoient raisonnablement estre suspects, de fauoriser les executions: Au contraire, sçauent ceux d'Agen (& il allegue c'est exemple par ce que c'estoit sa residence, & que ceste ville Episcopale à quelque nom).

Que les Catholiques, ny souffrirent jamais, ny mauuais traictement en leurs personnes & biens, ny jnnouation au fai& de la Religion, Que le Clergé vaquoit au seruice accoustumé, que les Moines preschoient librement, en la plus forte ardeur desdictz troubles, qu'il se contenta que ceux de la Religion pour ne les troubler en rié, eussent leurs presches en maisons d'emprût, Que pour subuenir aux necessitez de sa defence, il prenoit sans plus les Decimes que le Roy souloit leuer sur le Clergé, tous ses patrimoines, luy estans saisis de toutesparts, Et de ce eust peu tesmoigner feu M^oseigneur le Duc de Mont-pensier, Prince tres-affectonné à la Religion Romaine, comme chacun sçait. Comme aussi en tesmoigneront Monsieur le Marechal de Biron, Monsieur l'Archeuesque de Vienne, Monsieur de Ville-roy Secretaire d'Estat de sa Majesté, & plusieurs autres qui l'ont veu sur les lieux.

XV.

Et ne fut si tost accordée la liberté des cōsciences, bien qu'avec tres-grandes restrictions au regard de l'Edict precedent, qu'il ne fut tout prest de poser les armes, sans delay, encores qu'il en peust cōtinuer la prise (comme sçait tres-biē sa Majesté) avec plus de for-

ce & de moiens, par le notable secours qu'il auoit negocié & obtenu des Princes de mesme Religion, si auant qu'une forte armée estrangere estoit sur le point d'entrer en ce Royaume. Mais il s'estima heureux d'en pouuoir sortir sans qu'à ceste occasion le pauvre peuple eust à souffrir d'auantage. Aymât mieux empirer sa condition en le foulageant du mal prochain, que de l'amender a son dommage. Prie donc lediét Seigneur Roy de Nauarre, vn chacun de prononcer librement, si par ces deportemens il à en rien meritè le nom qu'ils luy dōnent de persecuteur de l'Eglise Catholique, s'ilz ne veulent appeller persecuteur, ce luy qui ne s'est pas peu resouldre à leur laisser executer leurs barbares persecutions, & sanglans desseins contre luy de prime face, mais en conséquence contre le Roy mesme, & son estat.

XVI.

Es païs esquels par la grâce de Dieu, l'edit Seigneur Roy de Nauarre à puissance souueraine, il pense aussi peu auoir acquis ce blasme, voire qui aura bien cognu la nature des choses, & la suite de tous ses deportemens: Et de faict en ce qui luy reste du Royaume de Nauarre; ayant trouué l'exercice de la Reli-

gion Catholique Romaine a son aduenemēt, il ny a rien innoué ny alteré, tellement que le seruice d'icelle y est par tout, fors qu'en deux lieux seulement y a exercice de la Religion reformee : Et quant au païs de Bearn, qui n'est pas si grand, la feüe Royne sa mere, en vne assemblée generale des Estats, y ayāt estably la dite Religion de laquelle elle faisoit professiō sans que sur ce changemēt fust ensuiuite plainte auditz Estats plusieurs ans depuis il declare libremēt qu'il y à continué le mesme estat, ayant tousiours estimé qu'un Prince biē conseillé, ne doit sans necessité ou euidēte vtilité, introduire en chāgemēt en son estat. Et la ou la necessité mesme y est, q̄ ce changemēt doit estre fait par la mesme voye, parlaquelle l'Ordonnance à esté faicte. XVII.

O R auoit il veu qu'apres la S. Berthelemy, comme il eust ployé sous la force au faict de sa Religiō, & enuoyé en seldits païs de Bearn, pour Gouverneur, & Lieutenant General le Sieur de Mioxans, que chacun cognoist pour Catholique, avec charge expresse d'y remettre la Religion Catholique Romaine : Nonobstant le des-espoir des affaires de la Religion en France : Nonobstant la profesion contraire de luy-mesme, qui pouuoit ser-

uir d'exemple : Nonobstant l'autorité d'un gouuerneur par luy expres enuoyé, ilz s'estoyent tous resolués à perseuerer en leur Religion & à maintenir la forme de leur Estat, sans y receuoir ce changement : Pensa donc ledict Seigneur Roy de Nauarre (& juge vn chacun si à bon droit) que c'estoit à ses Estats vne resolution fixe & ferme, puisque la necessité & mesmes telle necessité qui dōne la Loy à toutes Loix ne les en auoit peu demouuoir aucunement. Comme aussi de faict en toutes les assemblees d'Estats qui se tiennent d'an en an en sondit païs de Bearn, n'est jamais comparu personne qui ait requis ce changement, encores que la liberté y soit telle qu'on cognoist, de proposer jusques au moindre grief qu'on pretend receuoir du Prince, & en requerrir la reparation, dont appert que ce n'est qu'une pratique de dehors, de ceux qui enuiēt le repos de ses sujets & non vn desir interieur d'iceux : & n'a laissé pourtant ledict Seigneur Roy de Nauarre de faire tousiours payer les pensions des Prelats & autres Ecclesiastiques de sondit païs, dont il ne prend autres à tesmoins qu'eux-mesmes : & le plus souuent de ses propres deniers, comme scauent les Euesques de Daqz & d'Oleron, & autres, Qui plus

est de son propre mouuement pour conten-
 ter ceux de ses sujets qui pouuoient conti-
 nuer en la Religion Catholique Romaine,
 modera les ordonances de la feüe Royne sa
 mere pour le faict de la Religiõ, qui n'estoyët
 qu'amendes pecuniaires fort legeres, tant s'en
 faut que jamais on y ait procedé contre les
 Catholiques par rauissemens, punitions cor-
 porelles, morts, bruslemens, tourmens, recer-
 ches, ainsi qu'ont conseillé, pratiqué, & intro-
 duiët, ceux qui aujourd'huy se disent prote-
 ctors de la Religion Romaine, contre ceux
 de la Religion cõtraire: & de ce sont tesmoins
 les Catholiques de Bearn qui viuent en toute
 paix & tranquillité, & desquels plusieurs exer-
 cent offices notables, ou audiët pais, ou pres
 de la personne dudiët Seigneur Roy de Na-
 uarre: & qui mesmes ont les premieres char-
 ges en ses gardes, & les Capitaineries de ses
 meilleures maisons: ce qui certes il n'est appa-
 rët qu'il voulut faire s'il les auoit mal-traitez,
 ou s'il leur gardoit vn mauuais cœur a l'ad-
 uenir.

XVIII.

O R par-ce que dessus seroit assez respon-
 du à ce qu'ils disent qu'il est ennemy juré des
 Catholiques, mais lediët Seigneur Roy de

Nauarre qui voudroit ouurir son cœur à tout le monde ne s'ennuyera point de leur descouurir ses affections & actions . Declare donc lediēt Seigneur Roy de Nauarre qu'il cognoist & croit, & a tousjours creu & reconnu, que pourueu que le fond de bonne conscience y soit, la diuersité de Religion n'empesche point qu'un bō Prince ne puisse tirer tres-bon seruice indifferemment de ses sujets, & que les sujets ne rēdent reciproquement le debuoir qu'ils doibuēt, soit à leurs superieurs, soit à leurs Princes . Estant euident que les deux religions recommandent egaleement, selon la Parole de Dieu, le debuoir du sujet enuers son Prince, & de l'inferieur vers son Supérieur : Et pourtant s'est tousjours attendu lediēt Seigneur Roy de Nauarre de n'estre moins fidelemēt serui des vns que des autres. Comme aussi de faiēt en la distribution des charges de sa maison ou chacun sçait assez qu'il les y-a tousjours pourueus , Sçait aussi ledit Seigneur Roy de Nauarre qu'il est bien aymé & bien serui des Gentils-hommes Catholiques, & autres personnes de toutes qualitez qu'il a retirez à son seruice , comme de leur part ils cōfesseront tous volontiers qu'il les à aimez sans exception de leur religion, &

selon la proportion de ses moiens , leur a de-
 parti de ses biës, & honeurs aussi largemët, &
 plus mesme au tēps de la guerre, qu'a ceux qui
 faisoient mesme profession que luy: Et sçauët
 aussi les Seigneurs Gentils-hommes , & tous
 autres Catholiques, que durant les troubles,
 il les a espargnez, tāt qu'il a peu en leurs biens
 & maisons, sans auoir jamais souffert que con-
 tre eux ait esté exercé aucune rigueur de guer-
 re, mesmes, contre ses vassaux armez contre
 luy, qui se trouuoient à la ruïne & demolition
 de ses propres maisons. Lesquels la guerre fi-
 nie, le venant trouuer ont esté tous les biens
 venus sans jamais leur en auoir, ou tenu pro-
 pos facheux, ou fait vn mauuais visage, tāt s'en
 faut que selon les diuers moiens, que le Sei-
 gneur a sur son vassal, Il ait pratiqué cōtre eux
 ou directement, ou indirectement vne seule
 espece d'animosité, ou de vengeance. Comme
 aussi s'ose promettre de ses actions, Ledit Sei-
 gneur Roy de Nauarre, que les Catholiques
 qui ont voulu s'approcher de luy, en seroient
 partis contens, & n'auroient rien remarqué
 dont ils pussent presumer qu'une naturelle af-
 fection d'embrasser tous les seruiteurs, & sub-
 jects du Roy de quelque religion qu'ils soient
 de mesme sorte, se promettant de leur part

ceste mesme bien-veillance, qu'ils ont tous-
jours demonstree enuers les siens.

XIX.

Les susdictz effectz qu'il a de tout temps
& jusques a present cōtinuez, Pense ledit Sei-
gneur Roy de Nauarre, auoir assez de poix
pour emporter les paroles que ses ennemis
publiēt cōtre luy: Or ont ils dit neantmoins,
que ledit Seigneur Roy de Nauarre, auoit
enuoyé en Angleterre, & Allemaigne, brasser
vne Ligue à la ruïne & confusion des Catho-
liques, preuoyant la mort du Roy, aduenant
laquelle il se preparoit à la mutation de la Re-
ligion, & vouloit enuahir les biens du Clergé,
Vouloit confisquer ceux de la noblesse, qui
n'adhereroiēt à son intētion. Et sur ce subiect
ont semé par tout, mesmes fait lire es sermōs
en plaine chaise, certain concordat, de l'an mil
cinq cēs quatre-vingtz quatre, en date du 14.
jour de Decembre, resultant d'une assemblée
qu'ils disent auoir esté tēüe à l'instance dudit
Seigneur Roy de Nauarre à Magdebourg,
que pareillemēt en l'assemblée tenue à Mon-
tauban, il auroit conclud & iuré dabolir
(aduenant la mort du Roy) la Religion Ca-
tholique Romaine, l'a despouillant de ses biēs
& priuant ceux qui en feroient profession de

tous Estats & dignitez. Et ici se verra euidement, comme toute calomnie de sa nature se descouure & refute d'elle mesme.

XX.

P R O T E S T E donc ledit Seigneur Roy de Nauarre deuant Dieu, & en sa conscience qu'il desire & fouhaite de tout son cœur, longue & heureuse vie au Roy, son souuerain Seigneur, ne luy estant jamais entré en l'opinion de bastir desseins, n'y sur sa mort, n'y apres sa mort. Lesquels il estimeroit non seulement crimes ds leze Majesté, ne pouuant iceux proceder que d'un desir miserable de la mort de son Prince, qui seroit fuiui de prompts effects si la puissance y estoit. Mais mesmes seroient crimes en quelque façon cõtre nature, & contre le sens commun. Estant sa Majesté graces à Dieu, en la force de son aage, & plaine de santé, & leur aage au demourant si peu different qu'il seroit ridicule pour la difference de deux ans ou enuiron, de prendre tel aduantage l'un sur l'autre, tant s'en faut, que comme ont faiët les chefs de la Ligue, il luy soit jamais monté au cœur, de condamner le Roy à mort prochaine, en preuoyant les consequences de sa mort, trente ou quarente ans pour le moins, comme il espere, premier qu'il en soit

besoin: Et sous le pretexte de prouuoir aux
 affaires du Royaume, le mettroit a present en
 vne confusion tres-deplorable. Tant s'en faut
 aussi que par publique declaration, il ait pro-
 noncé & pre-jugé steriles, & le Roy & la Roy-
 ne sa femme en la fleur & force de leurs ans,
 comme ils ont fait, chose qui ne fut jamais pra-
 tiquee en Estat de Chrestienté, chose que les
 Estats d'Angleterre n'ont pas voulu requerir
 de la Royne d'Angleterre nō encores mariee,
 se reposans tant sur sa prudence que celle qui
 les a regis en Paix durant sa vie, les voudra lais-
 ser en heritage à sa posterité: Brief qu'il n'a re-
 quis le Roy, son souuerain Seigneur de le de-
 clarer ce que naturellement & legitiment
 il est, ou d'en dōner quelque marque, soit par
 vn tiltre nouveau, soit par quelque accroisse-
 ment ou aduentage, comme les susditz ont en-
 trepris, qui luy ont armé Monsieur le Cardi-
 nal de Bourbon, Prince aagé de soixāte six ans,
 Prince hors despoir & de mariage, & de po-
 sterité, pour estre son heritier, cōme si le Roy
 n'auoit plus qu'un an ou deux a viure, pour lui
 susciter semence, comme si d'un vieil estoc de
 Celibat, nous deuoit plustost sortir lignee,
 que d'un mariage vigoureux & florissant de sa
 Majesté: Comme ainsi fust toutes-fois, que le-

dit Seigneur Roy de Nauarre, ne peut ignorer les desseins que les susdicts projectoient de long temps contre luy, les pratiques qu'ils faisoient dedans les villes, menees qu'ils tramoyent en Italie, & en Espagne, de l'exclure aduenant la mort du Roy, du droit de succession en ce Royaume, duquel il espere que Dieu luy fera la grace donnant longue vie au Roy, de n'auoir subiect de cōtester, s'assurāt aussi que ce que le droit, & la nature luy voudroyent dōner, par toutes leurs Liges & brigues, ils ne pourroyent l'empescher de l'obtenir.

XXI.

RECOGNOIST franchement ledit Seigneur Roy de Nauarre, que long temps à il se feroit tres-bien apperceu des desseins des susdicts contre le Roy & son Estat, & supplie tres-humblement sa Majesté de se ressouuenir des aduertissemēs qu'il luy en auroit donné dès l'an mil cinq cens soixante seize, luy ayant enuoyé certains memoires par vn Gentil-hōme expres, qui aujourd'huy s'effectuent de poinct en poinct, & deslors cōmençoient a se fonder, sous le nom de cōfrairie & Ligue Saincte. Que tost apres la paix de l'an mil cinq cens soixante dixsept, il auroit aussi veu

hauffer les bastimens par les remuëmës qu'ils
 firët entre les Estats suscitez en diuerses Pro-
 uinces, contre le seruice de sa Majesté, si auant
 qu'ils y auoyët voulu attirer ceux-mesmes de
 la religion, En auroyent traicté avec le tres-
 illustre Prince Casimir Comte Palatin du
 Rhein, lequel ayant veu au fond de leurs des-
 seins (comme il le recognoistra tousjours)
 qu'ils pretendoyent à l'Estat, pour l'honneur
 & l'amitié que les siens & luy auroyent de
 tout temps porté a la maison de France, n'y
 auroit voulu entendre plus auant: Que depuis
 comme les affaires s'acheminoyent pas a pas,
 auroit aussi descouuert les traitez qu'ils auoiët
 en Italie & en Espagne, les deniers qu'ils en
 tiroyent, les propositions qu'ils y faisoient,
 les respones qui leur estoient faictes sur
 icelles, lesquelles sa Majesté ne pouuât en son
 esprit conceuoir, auroit fait difficulté de croi-
 re vne si grande ingratitude & perfidie, des-
 quelles toutes-fois lediët Seigneur Roy de
 Nauarre comme d'une mine par luy descou-
 uerte, attendoit l'esclat de jour en jour: Qu'il
 se souuenoit de la prise & execution de Sal-
 cede, qui auroit déposé grande partie de ce
 qu'on void aujourd'huy, qu'on auroit tasché
 d'obscurcir pour lors par artifices. Mais, dont

estoit demeuré quelque certitude au cœur de tous vrais François, Que feu Monseigneur n'en auoit pas aduerti le Roy sans fondemēt, Que le Roy aussi s'il n'eut esté criminel que des crimes ordinaires, n'eut pas pris la peine de l'enuoyer querir au païs bas, par deux personages des premiers de son conseil d'Estat, & n'eut pas aussi voulu estre present à ses interrogatoires & recolemens, & dont s'en ensuiuit que par arrest de la Cour de Parlement de Paris, il fut tiré a quatre cheuaux, cōme traistre au Roy, & a la France. Que par leurs memoires precedens & par leurs cōfrairies qu'ils dressoyent de nouueau, en la plus-part des bonnes villes de ce Royaume, apparoissoit assez de leur pretexte, qui estoit d'exterminer la religion, de laquelle il fait profession, & luy mesme particulièrement, & si en eux estoit tellement quē le premier coup de leur tonnerre auroit a fondre sur luy, si tant estoit qu'entre-cy & là sa Majesté ne recogneut la fin de leurs pratiques. Pour ceste occasion voyant que sa Majesté ny auoit donné autre ordre, preuoyant lediēt pretexte qu'ils prendroyent d'extirper tous ceux de la religion, il auroit esté induit de penser a ses affaires, & pour-ce auroit sur la fin de l'an mil cinq cens

quatre-vingts trois , depesché vers la Royne d'Angleterre , le Roy de Dannemarc , les Princes & Electeurs d'Alemagne, le Lanfgrau de Hessen , & autres Princes & Estats, le Sieur de Segur Pardaillan , superintendant de sa maison, premierement pour les exhorter a chercher les moyens de composer tous les differens en la religion qui restoyent entre les Eglises reformees, desquels on abusoit a leur ruine commune , Secondement pour renouer & assurer vne bonne amitié avec eux, & sans toutes-fois les requerir ni employer plus auant, Tiercement pour deposer en Alemagne vne bonne somme de deniers , laquelle au besoin luy peult ramener vn bõ secours contre ses ennemis : Tous les susdicts Roys Princes & Estats alliez estroitement de la Couronne de France , vers lesquels le Roy a ses Ambassadeurs, & avec lesquels ledit Sieur de Segur auoit charge de communiquer , & cõmuniquoit de fois a autre, lesquels il prend pour tesmoins de ses faiçts & diçts , de ses propositions, negotiations, cõclusions: Comme depuis le retour dudit Sieur de Segur, il à supplié tres-humblement sa Majesté de luy faire c'est honneur de se faire informer diligemment de toute sa legation, s'assurant que

plus clair il y verroit, plus il recognoistreroit
deceur François, de sincere affectiō, & de vra-
ye fidelité enuers sa personne & son Estat.

XXII.

REQUIERT donc icy ledict Seigneur
Roy de Nauarre tous les dessusdicts Serenif-
simes & Illustrissimes Roys, & Princes, d'at-
tester au Roy par leur seing propre a ce Roy-
aume & a la Chrestieté, si oncques de sa part,
leur ont esté baillees lettres ou memoires, ou
tenu propos ou contre la dignité du Roy, ou
cōtre le bien de son Estat, ou cōtre le debuoir
en somme de tres-humble & tres-deuotieux
seruiteur & subiect, & si jamais leur a esté par-
lé de faire la guerre au Roy, de renouveler les
troubles, ou de ruiner les Catholiques, si onc-
ques ouuerture directement ou indirectemēt
à esté faicte sur la mort ou en consequence de
la mort du Roy, aux susdicts Princes. Supplie
tres-humblement ledict Seigneur Roy de
Nauarre sa Majesté, qu'il luy soit permis d'en-
uoyer ceste sienne declaration contre les sus-
dictes calomnies, la faire presenter par les
Ambassadeurs mesmes de sa Majesté chacun
endroit soy, a tous les Princes Chrestiens,
amis, & confederez de ce Royaume, afin que
s'il traicte chose semblable le voyant prote-
ster le

ster le contraire, ils l'estiment Prince feint, de peu de Foy, non veritable, & indigne au reste de leur amitié, que les dessusdicts calomnieurs veulent rendre si suspecte, & que de sa part il declare franchement desirer soigneusement entretenir, comme il pense l'auoir recherchee tres-raisonnablement.

XXIII.

Q V A N T au Concordat ils le datent du quatorziesme Decembre, mil cinq cens quatre-vingts quatre, & y font present le Sieur de Segur, en qualite d'Ambassadeur du Roy de Nauarre, lequel estoit parti d'Allemagne, repasse es pais bas, & des pais bas en Angleterre, ou il auoit sejourne deux mois & plus, & nonobstant tout ce temps, s'estoit rembarque pour reuenir en France auant le quatorziesme jour de Decembre. Audit Concordat introduisent les Ambassadeurs de l'Electeur Palatin & du Prince d'Orenge, l'un mort plus d'un an auparauant, n'ayant laisse qu'un mineur, pendant la minorite duquel, le Duc Casimir gouerne l'Electorat, l'autre assassine quatre mois deuant, par un Iesuite suborne par leurs semblables, Et tous ces deux toutes-fois s'obligent a se trouuer encores au mois de May en la ville de Basle, pour la composition des differents de la Religion. Adjoustant que le

Roy de Nauarre le dixhuiſtième Auril lors prochain, promettoit prendre les armes, aſſa-
 uoir par-ce qu'en ce meſme tēps ils s'eſtoyēt
 reſolus de les prendre, & en veulent deriuier
 la haine ſur ce Prince, qui tout enuironé qu'il
 eſt de leurs menees, ne bouge point : datent
 ledit reſultat de Magdebourg ville appartenā-
 te au fils de Monſieur l'Electeur de Brangde-
 bourg, & du pere, ny du fils en ce Concordat
 ne ſe ſouuiennent point : & c'eſt auſſi vne aſ-
 ſemblee imaginaire, car ny en ce lieu, ny en
 autre ne ſe trouuera qu'il en ait eſté tenu
 aucunement. Les tiltres au reſte, & les quali-
 tez des Princes y ſont ſi mal obſeruees, les
 quotitez auſſi & les contributions de deniers
 & d'hommes ſi mal proportionees, tant d'ab-
 ſurditez en ſomme & de chimeres, que s'eſt
 non ſeulement trop de honte ou trop d'im-
 pudence, d'abuſer la France de choſe ſi lour-
 de, mais choſe prophane & digne d'un bāc de
 Charlatan, & de la Chaize de quelque Ieſui-
 te, qui à licentieuſement accouſtumé de rem-
 plir de comptes, meſmes ſi mal digerez, l'o-
 reille d'un pauvre peuple attentif à ſes deuo-
 tions. Car que peuuent leſdicts calomniateurs
 gaigner ſur oreilles plus accortes ?

XXIII.

L'ASSEMBLEE de Montauban ne meri-

te plus de blasme par-ce qui en est, ne plus de creance, par-ce qu'en ont publié ceux de la Ligue. La verité est que le Roy faisant la paix l'an mil cinq cens soixante dixsept en intention qu'elle fut exactement & diligemment executee, auroit delaisié en garde au Roy de Nauarre, & a ceux de la Religion, huit villes pour l'espace de six ans, pendant que les animositez & deffiances s'esteindroient, & amortiroiét en ce Royaume: Que nonobstant ceste bonne intention plusieurs qui ne demandoyét qu'a resusciter les troubles, qui depuis ont pris les armes avec les auteurs de ceste Ligue, trauersoyent par tous moyens l'execution d'un Edict de paix, & donnoyent a toutes heures par entreprises nouuelles, occasiõs de deffiances, tellement que les playes que le temps debuoit cicatrizer s'aigrissoyent & ledict Edict de paix, que le temps debuoit effectuer, s'en alloit reculât pas a pas, & estoit retranché poinct apres 'poinct, Que par la continuation de ces pratiques seroit aduenü, que durant lesdicts six ans la paix auroit esté interrompuë diuersement par surprises, attentats, & mesmes par guerre ouuerte, qui auroit duré vn an entier, dont seroyent sorties les conferences de Nerac & Fleix, tellement que le temps des six ans qu'on auoit prefix pour

la remise des places, n'auroit peu fournir obstant les susdictes interruptions, a l'exécution de l'ediect & à l'amortissement des animositez qu'on se promettoit dedans ce temps: Ce pendant le Roy sollicite d'aucuns demandoit que lesdictes villes luy fussent remises attendu le temps qui estoit expiré: & ceux de la Religion de l'autre part, voyans les causes durer, sçauoit est les occasions de deffiance, & les animositez renouueeles par les troubles en faisoient quelque difficulté, Supplians tres-humblement sa Majesté de n'auoir esgard au temps prefix, mais au mal qui s'y estoit entrejecté & cōsiderer plustost le faict qu'il se seroit promis pendant les six ans, & au bout des six ans, asçauoir l'exécution & continuation de paix, & par conséquent l'amortissement de la deffiance & animosité, & au bout des six ans par conséquent la remise de ses places, laquelle (les choses estans en c'est estat) sembloit n'estre conuenable à ceste grace & equité de sa Majesté, dont premierement la concession des places estoit procedee, veu que la condition par luy esperée n'auoit procedé comme il esperoit. Pendant ce temps sa Majesté donc considerant ces raisons, & n'affectant pas le terme, ains ce qu'il auoit attēdu au bout du terme, asçauoir

la guarifon du mal, & la reünion de fes ſub-
 jectz, trouua conuenable de ne preſſer ceux
 de la Religion à la rigueur: & comme le Roy
 de Nauarre luy eut remonſtré que ſesdicts
 ſubjects de la Religion auoyent de grandes
 plaintes à luy faire concernant l'exécution de
 ſes Edicts, Leſquelles ouyes & ſatisfaites, ſe-
 roit plus aiſé de paruenir à la remiſe deſdictes
 places, ledict Seigneur Roy conſentit par la
 bouche du Sieur de Belieure, l'un des princi-
 paux de ſon conſeil d'Eſtat, à la requiſition
 dudit Seigneur Roy de Nauarre à l'aſſem-
 blee de Montaulban, compoſee de Princes,
 Seigneurs, Gentils-hommes, & perſones qua-
 lifiees de ladicte Religion, Et fut ledict Sieur
 de Belieure au nom du Roy en ladicte ville
 de Montaulban tant que l'aſſemblee dura, Le-
 quel ledit Seigneur Roy de Nauarre requiert
 pour teſmoin de ſes actions, & deſire eſtre
 ouy & creu en tout ce qu'il a cognu de ladite
 aſſemblee. Ainſi ce n'a pöint eſté cöme la leur
 vne cöuocation au deſceü ou contre le gré du
 Roy, mais par le conſentement & cömande-
 ment de ſa Majeſté, meſmes que l'ayant bien
 meurement deliberee, l'a jugee vtile & neces-
 ſaire au bien & repos de ſon Eſtat.

XXV.

En c'eſte aſſemblee fut dreſſé vn Cahier

general des inexecutions & contrauentions de l'Edict de Paix, qui fut presenté au Roy, à S. Germain en Laye, par Monsieur le Comte de Laual & autres deputez, Auec tres-humble requeste de prouuoir aux doleances de sesdictz sujetz de la Religio: fut aussi promis par tous & chacun pour quelque attentat particulier qui se fit contre eux, de n'en recercher point la reparation par attentats reciproques, de peur que la temerité de quelques particuliers ne reiettaist ce Royaumes aux troubles, comme quelques-fois on l'auoit ja cuidé veoir, mais d'en faire plainte au Roy de Nauare, lequel la feroit entendre au Roy, qui selon son inclination assez commune au repos de ses subietz y sçauroit prouuoir de remedes cōuenables, comme reciproquement le Roy de Nauarre leur promettoit d'embrasser leur cause enuers sa Majesté, & la luy représenter soigneusement, lors qu'il en seroit besoin, comme il auroit tousiours faict par le passé, afin que voyant qu'il entreprenoit leur cause enuers le Roy, ilz fussent plus retenuz dans les voyes de la raison, sans penser aux extraordinaires qu'ils auoient tentées par le passé, faute de recours, & de support aillieurs. C'est tout ce qui se trouuera auoir esté faict en l'adite assemblee, & rien plus que cela, & le but en est

tres-euident , d'empeschier que des attentats particuliers ne prouint vn mal public , qui troublast la Paix de ce Royaume , confirmee à la Cōference de Nerac tenue avec la Royne mere du Roy,ou il en fut fait articles expres : Et ce qu'ils sement de plus est tout aussi vray que le concordat de Magdebourg , ou les Iesuïtes se sont oubliez, d'auoir fait tuer le Prince d'Orange qu'ilz font reuenir en jeu cinq mois apres.

XXVI.

ET de fait le Roy qui fut tres-bien aduertit de ce qui fut traicté en l'adiçte assemblee, trouua leurs raisons si bōnes, que de son plein gré il leur accorda encores les villes de seureté pour quelques ans, voyāt bien que son Edict n'estoit pas executé cōme il cuidoit : Et c'est vn des griefz dont les dessusdits de la Ligue vont s'escarmouchans contre le Roy de Nauarre, & protestent aujourdhuy contre sa Majesté mesme.

XXVII.

CERTES pense le Roy de Nauarre que quiconque se voudra ressouuenir de tout ce qui s'est passé en ce Royaume depuis treize ou quatorze ans , ne trouuera point estrange, qu'on ait demandé en Paix, quelques villes de retraite & seureté, Et qu'ō ait requis sa Majesté le terme venāt à expirer, mais l'Edict n'estāt encores executé, n'y les deffiances amorties,

que ces feuretez eussent à durer encor' pour quelque tēps, puisque le d'anger ne leur estoit leué, Et puis que l'Edict de Paix, duquel dependoit leur vie & leur repos, ne se voyoit point encor' en bō estat: Dira toutes-fois fort franchemēt ledit Seigneur Roy de Nauarre, que la cause principale pour laquelle, oultre la necessité commune de ceux de la Religion, il eust vn desir particulier de supplier tres-humblement sa Majesté de les laisser encores pour quelque temps, fut la conspiration des susdits, de laquelle il attēdoit l'effect à tous moments & contre laquelle ceux de la Religion, desquelz ils ont conjuré la mort, auoient besoin d'vn abry, tant que Dieu leur fist la grace que le Roy cognust leurs fins à bon escient. Et de faict la plus-part de ceux qui ont attenté durant la Paix sur lesdites villes de feureté, que le Roy des'auouoit tousiours, nous descouurent aujourd'huy suffisamment à l'adueu de qui ils osoient troubier la Paix, & entreprendre sur lesdictes places, & autres de la religiō, ayant pris les armes à la suite de la Ligue. Et ledit Seigneur Roy de Nauarre supplie tres-humblement le Roy, de se ressouuenir des aduertissemens qu'il luy donna peu de mois deuant ladite assemblee de Montaulban, qui estoient bien suffisans pour faire pēser des-lors

sadiete Majesté à ses affaires : & a ce defaut, pour.l'admonefter à bon escient de chercher ou retenir quelque seureté pour soy , auquel manifestement ils en vouloient.

XXVIII.

Qu'e s'ils disent aujourd'huy, qu'ils ayent pris les armes & faisi les villes de sa Majesté pour auoir aussi des villes de seureté à l'exemple de ceux de la Religion contraire, comme aucuns ont voulu dire: Les prie donc tous ensemble l'Edit Seigneur Roy de Nauarre, de declarer à la France , qu'elles deffiances les y meueët. Car certes mal-aisement pourroit elle deuiner qu'elles causes ils en ont, d'auoir a se deffier du Roy, d'auoir à se deffier des Catholiques, d'auoir à se plaindre ou de hayne, ou d'injure, ou de querele de leur part, certes on sçait trop que le Roy leur a cōmis ses forces & son Royaume, & s'il leur eust voulu mal ils n'auroyët pas tant de moyen à faire du mal, Qu'ils ont cōme partagé ce Roiaume entre leurs freres, & entre ceux de leur maison, par le moyen des grādes charges, & des grāds gouuernemens qu'ils ont, mēmes quelques-uns aux despēs des Princes de son sang, Qu'ils ont cōmandé aux armees, assailly les villes, & dōné les batailles, departy les charges, & distribué en somme la faueur du Roy quelques

annees , ainſi cōme ils ont voulu juſques a ce jour: pendant qu'ils ont faiēt ſemblant d'adherer à ſes cōmandemens , ils ont eſté honorez des bōnes villes, & ſuyuis de la Nobleſſe, & y ont eu autorité, y ont aſſeuré qui bon leur a plu , tant ſ'en faut que par autrui ou contre autrui, ils ayent eu beſoin d'y eſtre gardez ou aſſurez. Ont au reſte, (& on le ſçait) vuydé leurs quereles propres par les propres bras du Roy, executé leurs vengeanceſ aux deſpens de ſon Royaume. Si toutes ces aſſurances ne les rendent aſſurez , c'eſt la conſcience qui a peur, qui leur ramentoit qu'ils ont abuſé de la bonté du Roy , de l'autorité qu'ils ont eu de luy contre luy-meſmes, Et ne pouuans ſ'aſſurer contre luy que de luy meſmes, attentēt ſur ſa perſone , & enuahiffent ſon Eſtat. Que ſ'ils diſent qu'il leur faut des aſſurāces cōtre ceux de la Religion en France, certes chacun ſçait que pour huiēt places que ceux de la Religio retiennent, ceux-cy ont autant de Gouvernemens entiers en ce Royaume : & qui cognoiſtra ceſte inegalité (& n'y a ſi ignorāt qui ne la voye) ne croira jamais que contre eux ils ayēt pourchaffé des ſeuretés ne croira jamais qu'ils aiēt crainte d'eſtre attaқz de ceux qui juſques icy ont eu bien affaire à ſe defendre, qui ne les pouuoयēt bleſſer que couuerts du Roy, rēparez de ſon autorité, & armez de ſa puiſſance.

A FIN donc que chacun cognoisse la sincerité dudit Seigneur Roy de Nauarre, & leur feintises, & qu'alombre de quelques seuretez qui luy ont esté donnees, apres tant de justes deffiances, ils n'alleguēt d'auoir eu besoin d'en demander cōtre luy, Eux qui n'eurēt onc que des faueurs, qui ne font aujourd'huy mal que par la trop grande confiance qu'on à prinse d'eux, & la trop grande creance qu'on leur a donnee: Offre pour le bien de ce Royaume, nonobstant l'inegalité de leurs conditions en toutes sortes, Ledit Seigneur Roy de Nauarre, qu'il est prest de remettre és mains du Roy les villes de seureté qu'il à en garde, qui sont en sa puissance, sans attendre les deux ans de prolōgation, qu'il luy a pleu d'accorder, moyennāt que les susdicts posent les armes, remettent és mains du Roy les places qu'ils ont saisies, pour en ordōner à son bon plaisir. Offre d'abondāt nonobstant lessusdictes inegalitez, tant de sa part, que de Monseigneur le Prince son cousin, pour leur leuer les scrupules, s'ils en ont, & pour faciliter la paix, de remettre és mains du Roy les gouuernemens qu'il luy a pleu leur donner en ce Royaume, pour en ordonner à sa volonté, pourueu que les susdicts cedent par mesme moyen entre ses mains les

gouuernemens qu'ils tiennent: Tant s'en faut que pour l'asscurâce que chacun cognoist leur estre trop mieux deuë, ils importunēt le Roy de nouuelles seuretez & nouueaux gouuernemens, cōme eux qui n'ont honte de capituler en leurs articles, que les gouuernemens de Normâdie, Picardie, Lionnois, Saluces, Mets, Thoul, & Verdun, soyēt distribuez entre ceux de leur maison, C'est à dire à bien parler (veu ce que ja ils en ont) la plus grande partie de ce Royaume.

XXX.

P A R-ce que dessus pretend le Roy de Nauarre qu'il se void a clair, Qui d'eux, ou de luy cerchēt plus le bien du pauvre peuple, le contentemēt du Roy, le repos & tranquillité de c'est Estat, & de fait aussi seroit-ce chose trop absurde, que le seruiteur de la maison voulut estre creu plus zelateur du bien d'icelle, que l'enfant de la famille, Que des estrangers nous voulussent faire entēdre qu'ils eussent plus de souci de la cōseruation de c'est Estat, que ceux en qui ce souci est nay avec l'interest, Ces estrangers di-je, desquels la grandeur ne peut s'accroistre que par sa ruine & dissipation, & qui toutes fois n'ont point faict de consciēce de le publier ennemy de c'est Estat.

XXXI.

P R I E a ce propos ledit Seigneur Roy de

Nauarre tous les Ordres & Estats de ce Royaume cōparer icy (choſes toutes-fois non cōparables) les deportemēs de ſes predeceſſeurs en ce Royaume, & qui de pere en fils ont gardé ce nō de n'auoir jamais eſté auteurs ny de foulle au peuple, ny d'injure a la Nobleſſe, avec les deportemēs des predeceſſeurs des cheſs de ceſte Ligue, qui ſe trouueront auoir mis depuis qu'ils ont mis le pied en France, la venalité des Offices de Juſtice, les nouueaux ſubſides ſur le pauvre peuple, dont ils ont tiré le ſuc & la ſubſtāce, ſous les Rois Henry, & François deuxieſme, La cōfuſion és charges & dignitez qu'ils ont les premiers trāſſerées à leur plaifir, les vendans de main à autre, Bref, auoir accreu la Simonie en l'Egliſe, & introduit la ventē du tēporel à leur profit pour ſe véger de leurs ennemis ſous pretexte d'hereſie.

XXXII.

Q V A N T à ſa perſonne prie auſſi tous les Estats de ce Royaume, ſe ſouuenir & s'enquerir ſ'il a jamais eſté cauſe, quelques charges qu'il ait eu à ſouſtenir, d'vne charge ſur le peuple, au cōtraire cōment il gouuerne ce peu de ſujets que Dieu luy à donnez, qui ſe trouueront n'auoir eſté ſurchargez d'aucuns impoſts, tailles, ny ſubſides, nonobſtant les grāds affaires qu'il a eu vn ſi long tēps, Si onc il a fait

oultrage de faiçt ou de parole, es biens ou en la perſonne à Gentil-homme quelconque. (Quoy que de pluſieurs il ait eſté offeſé eſtrangement) ſi jamais auſſi, il en à traité aucun indignement pour quelconque occaſion que ſe puiſſe eſtre, ſoit en ſa maiſon, ou en ſes païs propres, Si jamais il a faiçt tort pour rigueur qu'il ait receu de ceux de la Religion Romaine à Prelat, Curé, Moine, ou aucū du Clergé, Au contraire, ſ'ils n'ont pas eſté touſiours biē venus & receus aupres de luy, plus preſt d'oublier les offenſes qu'on luy fait, que ceux qui luy en ont fait, à luy en faire, S'il n'a pas tousjours rendu hōneur & reſpect aux Cours ſouueraines, & aux Officiers d'icelles, a tous ceux en ſomme qui portent la marque de Juſtice, ſi jamais l'on la veu violéter la Juſtice par la force ou bien denier la force neceſſaire, ſi elle a eſté en lui a la Juſtice. Et quāt à toutes les partié, de c'eſt eſtat, n'a monſtré qu'honneur, amities & bien veillāce, n'a jamais faiçt deſplaiſir, n'a deſiré que plaiſir. Partāt ne peut eſtre aiſemēt creu ne eſtimé ennemy de tout l'Eſtat.

XXXIII.

P O V R le regard de l'Eſtat en general, il ne veut nier que les guerres Ciuiles n'ayent apporté en ce Royaume vne grande confuſiō en toutes choſes, pauvreté au peuple, diminution

à la Noblesse, ruïne au Clergé, mespris de Justice, engeâces de guerre, & sur tout d'une guerre Ciuile, qu'il pleure en son cœur, aquoy il voudroit remedier si possible estoit, mesmes par son propre sang? Mais atteste Dieu, atteste sa conscience, atteste la France mesmes, qu'il à les yeux assez clairs, & la memoire assez fresche, pour auoir biē veu, & pour bien se souuenir de tout ce temps, Si jamais il est venu aux armes que par le Conseil d'extreme necessité encor' que de lōgue main, il la peut auoir preueue & preuenue par la raison mesme, cōme tesmoigne assez l'assemblee de Blois, suscitee par la presente Ligue, qui le declaroit bāni de ce Royaume, & tous ceux qui fōt mesme profession, en cas qu'il ne changeast de Religion tout aussi tost, changement à luy peut estre nō difficile, s'il auoit aussi peu de Religion cōme eux: Si jamais aussi il a dilaié de recepuoir la Paix pour occasion particuliere que ce soit, quoy que son degré soit tel que ce qui luy est particulier puisse estre a bon droit estimé cōme public, quand sa conscience à peu estre satis-faïcte, quand il a peu veoir que ceux de la Religion, dont il faiēt profession pouuoient seruir Dieu selon leur Foy, en tranquillité, & en repos: S'il à jamais demandé rien d'aduantageux pour soy, creüe d'autorité, creüe de

penſiōs, ou creüe de charges, S'il n'a au cōtrai
 re mieux aime ſe veoir, comme il eſt encores,
 ſans autorité en ſon gouuernement, qui luy
 debuoit eſtre rendüe toute entiere par la paix,
 que de prolonger la guerre tant ſoit peu, que
 dedilaier d'vne heure le ſoulagemēt du peuple
 par la Paix, Ou que de troubler la paix, depuis
 qu'elle à eſté faite, faute de iouir avec plein ef-
 fet de ce qui eſtoit promis pour ſon regard es
 articles de la Paix. En ſoit pour teſmoin la Cō
 ſerēce de Fleix, en laquelle il ſe pouuoit ſeruir
 pour amēder ſes conditions du deſir extreme
 de feu Monſeigneur, de paſſer es païs bas, ou il
 eſtoit appellé par vne Amhaſſade generale des
 Eſtats deſdictz païs, qui l'en requeroiēt & ſo-
 licitoient tres inſtāment. Ce pendant il ayma
 mieux ceder ſon intereſt à l'accroifſſement de
 ce Royaume, que de differer ou marchander
 tant ſoit peu, pour le notable bien qui en eut
 peu venir en ſon particulier, Il fit donc la paix,
 l'accepta à telles conditiōs qu'il pleut à ſa Ma
 jeſté luy accorder pour faciliter la conqueſte
 deſdits païs, & pour y aller luy-meſme ſi ſa
 Majeſté l'eult eu pour agreable: Ceux-cy bōs
 François pour empescher que la Flandre, ne
 ſoit conjointe à la Frāce, lors que les Ambaſ-
 ſadeurs des païs bas l'offrurent au Roy à telles
 conditiōs qu'il eut voulu, preſts à recepuoir la
 Loy

loÿ de luy, prests a mettre dedans leurs villes telles garnisons & gouverneurs qu'il luy plairoit, pour l'en empescher troublent son Royaume, mutinent son peuple, commencent la guerre en pleine paix.

XXXIII.

Qu'elle puissance a eu le Roy de Navarre depuis tout ce tēps, quelque mescontement qu'il peut cōcevoir du traitemēt qui à la suggestion de leurs assemblees luy a esté faict, il le laisse à la cōsideration de tout le mōde, estant reculé du Roy, sans autorité en son gouvernement, non payé de ce qui luy estoit deu, trop moins respecté en ses affaires que le moindre Capitaine du Royaume, (soit dit sans reproche & pour la simple verité de ses deportemēs) S'il n'eut non plus resenti le mal du peuple que font aujourd'huy ceux de la Ligue, estant ce qu'il est, c'estoit pour perdre ledict peuple entieremēt. Mais il est François, & Prince François, mēbre de la France, qui sent ses douleurs & se deiul de ses playes: Diminution d'autorité faute de faueur, interest particulier, n'aura jamais pouvoir de le faire depiter cōtre soy-mesme, chose propre à ceux qui n'y sont qu'entrez legeremēt aux jambes de bois, & aux bras postices, qui ne sentent quand le corps se brusle, ausquels on peut bien donner l'exterieur, non l'interieur non le mouuemēt,

non le sentimēt de vrais François sur ces remuēmēs qu'ils declarēt & protestēt estre dire ctemēt cōtre luy, s'attaquāt à sa personne, à sa vie, à son hōneur, à sa cōscience propre, les voyās armez: Se saisir des villes au milieu de son gōuernemēt, enueloppé d'eux, irritāts sa patiēce incessāmēt, s'il n'eut respecté le Roy plus q̄ son propre dāger, s'il n'eust affecté le biē du Royaume, l'espōir d'une paix publique (si paix il y peut auoir avec telles gens) plus que sa cōsciēce mesme, y auoit il raison aulcune de se contenir cōme il a faiēt? Mais tout luy est bon, pourueu que le peuple ait repos, tout luy est vtile, pourueu que l'estat demeure en paix, le Roy obei, le Roy honoré comme il doibt estre, fust-ce à son peril tout euidēt, fust-ce à son dommage irreparable.

XXXV.

Et c'est en somme à quel titre le Roy de Nauarre à peu estre blasimé de ces beaux titres d'heretique, relaps, persecuteur de l'Eglise, ennemy des Catholiques, & perturbateur de c'est estat. Quant à la conclusion qu'ils en retirent, par laquelle ils le declarent incapable de succeder au Royaume, & ont fait prendre à Monseigneur le Cardinal son oncle, le nom de premier Prince du sang, & presomptif heritier, c'est certes le poinēt qui plus le touche

au cœur, mais auquel iusques icy il à pensé le moins,& qui luy est aussi venu tout le dernier, Se contêre sur ce point lediêct Seigneur Roy de Nauarre de l'espoir qu'il à que Dieu gardera long tēps saMajesté pour le bien de ce pauvre Royaume, luy dōnera lignee à tēps au regret de tous ses ennemis, se confie aussi qu'il à affaire à François quelque soin qu'on ait rēdu à les corrompre, qui sçauēt les droiêts, qui n'ignorent les descêtes, qui luy garderōt les rāgs qu'il doit tenir. Se cōsole en Dieu protecteur du droit, vēgeur de la violēce, qui void les vns & les autres, duquel le droit jugemēt n'est cōme des hōmes corruptible, duquel l'arrest est certain, l'exécution irreuocable, sans qu'ilz y puissent contreuenir.

XXXVI.

Pour conclusion en ce qui concerne la Religion, declare ledit Seigneur Roy de Nauarre au Roy son souuerain Seigneur, A tous ordres & Estats de ce Royaume, A tous Princes & Estats de la Chrestienté, tēporels, ou Ecclesiastiques, qu'il est & sera tousjours tout prest de se soubmettre à la determination d'un legitime Concile general, ou national, cōme il est porté par les Ediêts de pacification de sadiête Majesté, en ce qui cōcerne cest Estat & l'administation d'iceluy, qu'il acquiesce aussi tres-volontiers en ce qui en sera ordonné en

·vne legitime assemblee generale des Estats de ce Royaume quand sa Majesté aura agreable de la cōuoquer. Ce pendant qu'il ne desire autre chose que viure doucement sous le benefice des Ediëts, prest à employer sa vie, ses moyens, & ses amis, pour la defense du Roy, de son Estat, & de tous les bons subjects de ce Royaume. XXXVII.

Et d'autant que ceux de la susdicte Ligue l'ont pris pour subject & pretexte de leurs armes, & veulent faire penser qu'ils n'en veulent qu'à luy, semans en leurs susdites protestatiōs diuerses calomnies & le publient nōmeement en icelles desireux de la mort du Roy, perturbateur de l'Estat, & ennemi juré des Catholiques, & outre tout ce que dessus qu'il estime suffisant pour rēdre vn chacun satisfaiët de ses actions. Supplie lediët Seigneur Roy de Navarre en toute reuerēce, le Roy son souuerain Seigneur, aux oreilles duquel il ne doute point que ces calomnies ne soyēt paruenues, de ne trouuer mauuais (sauf tousjours l'honneur & le respect deu à sa Majesté) qu'il die & prononce en ce lieu, comme il faiët presentement, que ceux qui ont publié, & semé les susdictes calomnies contenuës és susdictes protestations contre luy, ont faussement & malicieusement menti.

53
XXXVIII.

Et d'abondant pour demétir leurs calónies par ses actions. Supplie aussi tres-humblemēt ledict Seigneur Roy de Nauarre ledict Seigneur Roy son souuerain, de vouloir auoir agreable la tres-humble fidelité & deuotion en l'offre qu'il luy faiēt. C'est que pour le repos & soulagemēt de sa Majesté, & de son peuple, il luy plaist trouuer bō de laisser demesler ceste querelle entre les susdicts & luy, sans y hazarder sa vie qui seroit trop chere à ce Royaume, & sans ce que sa Majesté s'en mette en autre peine. Esperant que Dieu luy fera encores la grace de trouuer assez d'amis tant en ce Royaume entre les seruiteurs de sa Majesté, que hors le Royaume entre les amis & alliez de sa Courōne, pour rēger lesdicts calōniateurs à la raison, leur faire reconoistre la tres-humble obeïssance qu'ils doibuēt audit Seigneur Roy son souuerain, & le respect & honneurs qui luy doit appartenir soubz luy.

XXXIX.

Mais particulierement par-ce qu'il ne peut penser sans souspirs & larmes à la grāde effusio de sang de la noblesse qui pourra sortir de ceste guerre, à l'extreme poureté & desolatiō qu'aura à souffrir le pource peuple, au desordre & à la confusion qui par là s'introduira en

tous Estats, au lieu que la pieté, debõnaireté,
 & prudẽce de sa Majesté, sans ces remuẽmens
 se preparoit cõme on scait à reparer cest Estat
 en sa premiere splendeur, prosperité, dignité, in
 tegrité en toutes sortes, Et sur tout aux blasphe
 mes execrables que produit la guerre contre
 Dieu, & au debordemẽt des vices qui accroi
 tra par la licẽces des armes, pour abreger ces
 misères que ledit Seigneur Roy de Nauarre
 voudroit rachepter de son sang propre, il sup
 plie tres-hũblement, & de toute son affection
 sa Majesté, qu'il luy plaise ne trouuer estrange
 l'offre que presentement il fait à Monsieur de
 Guise, puis qu'il l'a pris à partie en ses pretextes,
 & que ledit Sieur de Guise cõmande en l'ar
 mee de ceux de la Ligue, q̃ ceste guerre sans q̃
 plus auãt tous les ordres & estats de ce Royau
 me, ayẽt à en souffrir, & sans y entremettre ar
 mees domestiques, ny estrãgeres, qui ne pour
 roiẽt estre qu'à la ruine du poure peuple, soit
 vuidee & demeslee de sa personne à la sienne,
 vn a vn, deux à deux, dix à dix, vingt à vingt, plus
 ou moins, en tel nõbre que ledit Sieur de Gui
 se, voudra avec armes vsitees entre Cheualiers
 d'hõneur, Et pour le regard du lieu, s'il le desi
 re en ce Royaume, Supplie tres-hũblement sa
 Majesté de luy faire cest hõneur de le vouloir
 nõmer. Et ou il auroit ce Royaume pour sus-

peët, luy offre de se trouuer en tel autre lieu hors de ce Royaume, que ledit Sieur de Guise voudra choisir, & qui soit de seur acces nō suspect ny aux vns ny aux autres (honneur certes veu la disproportion, & inegalité de leurs personnes, & degrez telle que chacū cognoist, que ledit Sieur de Guise deura embrasser & racheter par tous moiës, heur aussi q̄ ledit Seigneur Roy de Nauarre, & Mōseigneur le Prince son Cousin achepterōt de leur sang tres-volōtiers pour rachapter le Roy leur souuerain Seigneur des trauaux & peines qu'ils luy brassent, son Estat de trouble & de cōfusion, sa noblesse de ruine, tout son peuple de calamité & de misere extreme.) Protestāt ledit Seigneur Roy de Nauarre deuāt Dieu & en sa cōscience qu'il n'est meū à choisir ceste voye ny d'ābiton qui soit en luy, ny de haine qu'il leur porte, ny de vengeance qu'il desire que de celle que de gayeté de cœur ils espousent contre luy, ains que le seul desir de voir Dieu serui & honoré, son Roy hors de peine, cest Estat en paix, le peuple en repos, luy fait volontairemēt prēdre le sort des armes, le seul desplaisir, & le seul mal-heur qu'il se represente à tous moments, de reuoir Dieu blasphemé, cest Estat exposé aux vagues, & au peril d'un naufrage, de reuoir ce pource peuple es extremitez & es miseres des-

quelles à peine a il peu encores respirer , desquelles à peine s'il y retombe vne fois pourra il jamais se releuer. XL.

S'ASSEVRE aussi & cōfie entieremēt le-
dit Seigneur Roy de Nauarre, q̄ le tout puis-
sant qui voit au dedans des cœurs, & qui presi-
de au sort des armes, mōstrera par le succez à
tout le mōde la sincerité & la Iustice de sa cau-
se, pour estre en exēple à la posterité & à tous
aiges: Dieu duquel il appelle l'ire, la vëgeance
& la maledictiō sur soy, s'il proteste à faux, s'il
à jamais conceu du mal contre la personne de
son Roy, cōtre son Estat, cōtre ses subjects de
toutes qualitez , de quelque Religion qu'ils
soient, si jamais il a balti ses desseins sur son tō
beau, si jamais il a minuté en son esprit violē-
ce aucune cōtre la Religiō Romaine, ou cōn-
tre les Catholiques, Dieu aussi duquel il attēd
la benedictiō, la bien veillance, & la faueur,
contre ceux qui sans occasiō luy pourchassent
sa ruïne, & sous ombre de son nō, remuēt ce
Royaume, renuersent tout ordre, ruinent le
peuple, & veulent despouiller le Roy de son
Estat.

Faiēt à Bergerac, le x. jour de Iuin, 1585.

Pseau. 120.

*Seigneur deliure mon ame des fausses leures, & de la langue
cauteleuse: Je demande la paix, mais quand i'en
parle, ils s'esmeuent à la guerre.*

F I N.















